

بیلیملی و اقتدارلی اوزبیک عیالی، نصیبه هولکر بیلن تانیشو

غلام محمد نینگ قیزی نصیبه هولکر ۱۹۹۰م. (۱۳۶۹ هجری شمسی) بیلی قوندوز ده توغیلگن. باشلغیچ اوقوونی جوزجان ولایتیده، اورتی مکتب و لیسه نی قوندوز ولایتی ده توگنگن و ۲۰۰۷م. (۱۳۸۶ ه. ش.) بیله بلخ یونیورسیتی نینگ شرعیات فاکولته سیگه اوقیش گه کیرگن و ۲۰۱۰م. (۱۳۸۹ ه. ش.) بیلی اوقیش نی امتیازلی بهالر و اعلی درجه لی دیپلوم بیلن توگنگن. کپین، مستقل وکیلر اویوشمه سیده امتحان تاپشیریپ، مدافع وکیللیک جوازینی آلگن و قوندوز ده بیرینچی خاتین مدافع وکیل بولیب، خاتینلر حقوقلرینی قانون گه بناءً حمایه قیلیپ، وکیل صفتیده ایش باشله گن. بو کوچلی و بیلیملی خانیم، مدافع وکیل بوله توریپ، میدیوتیک اداره سیده، ecw, nrc، مدنی جامعه بیرلشمه سیده، انسان حقوقلری بویچه مستقل کمیسونیده حقوقی یاردمچی و حقوقی اوقیتووجی صفتیده، همده مدنی ساحه لرده هم ایش- فعالیت کورستگن و خوددی شو دور ده اوزی نینگ حمایه چیلیک و وکیللیک، همده مدنی فعالیتلرینی باشله گن.

او، ۱۲ یاشیدن کپین استه – سبکین شعرلر یازه باشله گن. اونینگ شعرلری کؤپراق فارسچه دیر، اما اوز آنه تیلی (اوزبیک تیلی) نی سبؤگنی اوچون، بو تیلنی مکتب ده اوقیمه گن و ادبی و علمی صورتده اورگنمه گن بولسه-ده، ینه هم اوزبیک تیلیده شعرلر یازه دی.

او مکتبی نینگ تورلی مناسبتلر اوچون تشکیل اپتیلگن کنفرانس لریده باشلاوچیلیک قیلیپ، اوزی هم شعرلر و مقاله لری بیلن قتنه شیب کپلگن. شو فعالیتلری سببلی افغانستان ژورنالیست لری اویوشمه سیدن ژورنالیزم جوازینی هم آلگن و شو دایره ده اوز فعالیتی نی باشلب، دوام اپتیرگن. بو یازووجی و حقوقچی خانم تامانیدن یازیلگن ۳- ته اثری (بوگونگی افغانستان، یاش فکر و تلاش) جرمنی مدنی کمیته سی تمانیدن نشر اپتیلگن. او، اوز فعالیتی دوامیده انسان حقوقلری بویچه سلواکیه گه هم سفر قیلیپ، انسان حقوقلری، بیان اپرکینلیگی، مطبوعات اورنی، یخشی حکومتدارلیک، دموکراسی، باشقروو، تینچلیک و خوفسیزلیک ساحه لریده تعلیم آلیپ، خلق ارا مقیاسیده گی سرتیفیکیت لر نی هم قول گه کیریتگن.

او، خاتین – قیزلر حقوقلرینی حمایه قیلیش گه کؤپ قیز یققی اوچون شو ساحه ده ایشلش نی جوده کؤپ ایستردی. شونینگ اوچون کؤپ سعی -حرکتلر دن سؤنگ، قوندوز ولایتی ده گی عیاللر ایشلری ریاستی ده رییس بولیب ایش گه کیردی و نپچه ییل موفقیتلی ایشلب، سونگی کونلرده دولت سیناوی دن اوتیب، قوندوز ولایتی ده اداری معاون بولیب ایش باشله دی.

بو جسور خانیم حقیده هر قنچه سؤز یوریتیلسه، ارزییدی، اما اونی و اوی لرینی بیلش اوچون، اونینگ شعرلری بیترلی دیر. اونینگ شعرلری توپلمی حالی گچه نشر اپتیلمه گن، اما گزیتیه لر، ژورنال لر و فیسبوک کبی اجتماعی ترماقلرده نشر بولیب کپلماقده.

او تورموش گه چیققن و جگی باله نینگ آنه سی دیر.

قوییده اونینگ بیر نپچه شعر، اورنک صفتیده بپرله دی:

افتخارلی کشوریم ، افغانستانیم یشنه گیل
بابامیزدین قالگن ای شوکتلی شانیم یشنه گیل
کیم سېښینگ قصدینگه بولسه بیتمه‌گه‌ی مقصودی گه
باتور وقت وزمان، ای قهرمانیم یشنه گیل
جوزجان و ارزگان و بادغیس و قندهار
خلق ارا شهرت قازانگن بامیانیم یشنه گیل
اجنبی اوستینگه کپلسه زره پروا قیلمه گیل
جان فدا بغلان وکوندوز، تالقانیم یشنه گیل
باتور و هم قهرمان اول جان فدا اولدلرینگ
افتخار ایتگه‌ی سېښگه، ای باستانیم یشنه گیل
کیم ابرور اهل وطن، شکرینگ نی قیلگه‌ی هرزمان
خلق ایچیدن قد کوترگن قهرمانیم یشنه گیل

■ ■ ■

مېن کبی دېوانه بولگن، عاشق زارینگ قنی
کېچه- کوندوز تینمه‌گن، یار وفادارینگ قنی
بار و یوقیم نینگ فدا قیلدیم سېښینگ یولینگه، آه
حسرت او تیگه یانیب، مېن دېک فداکارینگ قنی
ای آچیلگن غنچه مېڼگه بېرمه گین مونچه الم
کېل یانیمگه سېوگلیم، مېن دېک طلبگارینگ قنی
نصییه هولکر ۱۳۹۲

■ ■ ■

اگر عشقینگ او تیده کویسه جانیم
کوترمه‌یم قؤل اوستینگدن جهانیم
بوتون دنیا مېڼگه بولسه خریدار
اوزینگدن باشقه گه بېرمم نشانیم
بولرسن کوزلریمگه بیرکون عاشق
حقیقت قیته دور اوشبو گمانم

اگر باشیمگه کپلسه هم قیامت
خیالینگ بیرله اؤتگهی دیر زمانیم
نصیبه هولکر ۱۳۹۴/۹/۲۸

■ ■ ■

عجب مین بقرار ابردیم سبنی بیردم کؤرایین دېب
کؤنگول رازین بیان ایلېب یولینگه جان بېرایین دېب
قرانغو کچه لرده آی می سن یا یولدوز بختیم؟
توشوم ده آسمان کپتسم یوزینگ نی بیرقرایین دېب
اگر بیرکون سبنی کؤرسم مینگلر التماس ایلېب
گۆزهل یاریم صفا بیرله که مین یارینگ بؤلایین دېب
خیر، گر ناتوان بولسم صفات صورتینگ دن یار
نمایان قیل جمالینگنی، حالینگنی بیر سؤراین دېب
نصیبه هولکر

■ ■ ■

ای وطن سېن دېک گلستان قیده بار
سبنی باغینگ دېک بهاران قیده بار
جان بیرهی عشقینگه مین افغانستان
اولادینگ دېک مرد میدان قیده بار
یشنه اولکه م سېنگه قیلسم افتخار
هرزمان بو یخشی دوران قیده بار
مرحبا ای اؤزبېک و پشتون لریم
تاجیک و هزاره اؤغلان قیده بار
تېموریم اولادی ترک لر تاجی دیر
سیز کبی بیر باغ و بوستان قیده بار
خوش یشر هولکر سبنی شاد ایلهبان
اولکه سېندېک مېنگه جانان قیده بار
نصیبه هولکر

